

Naqqiut

Saqqummiussissut 2. februar 2022-meersoq taarserpaa

(Naalackersuisuni akisussaaffiit allanngortinneqarnerisa kingunerisaanik aaqqiisoqarpoq)

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalackersuisunit saqqummiunneqarpoq:

Kalaallit Nunaanni eqqartuussisarnermik inatsisip aamma naalagaaffimmi tjenestemandit Kalaallit Nunaanniittut pillugit inatsisip allanngortinneqarnissaannik inatsisissatut siunnersuummut missingiutip (Pinerluttulerinermi eqqartuussisarnermi digitalimik attaveqaatinik atuineq, suliassat nassuernertut suliarineqartut, najuutinngitsoornermi eqqartuussutit, eqqartuussisut aamma najukkami eqqartuussisut tunuartaassataanerannut ukioritinneqartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut (Aatsitassanut Inatsisillu Atuutsinneqarnerannut Naalackersuisoq)

Tunngavilersuineq

Qallunaat Kalaallit Nunaanni akisussaaffeqarfiisa ineriartortinnissaannik qallunaat naalackersuisuisa Namminersorlutik Oqartussallu suliaqarnerannut atatillugu inatsisissatut siunnersuut suliarineqarpoq. Pingaartumik Kalaallit Nunaanni eqqartuussisarnermik inatsimmi allannguinnisanik arlalinnik inatsisissatut siunnersuut imaqarpoq, allannguinnissallu pinerluttulerinermik suliaqarnermi naammassiuminarsaanissaq siunertaraat.

Inatsisissatut siunnersuummi immikkoortut pingaarnerit tulliullugit makkuupput:

Pinerluuteqarsimasut pillugit eqqartuussisarnermi, qallunaat eqqartuussisarnermik inatsisaata § 148 c-p assinganik, digitalimik attaveqaatinik atuinerup eqqunneqarnissaata tunngavilerneqarnissaa inatsisissatut siunnersuutip siullertut siunertaraa. Siunnersuutip ilaa taanna Kalaallit Nunaanni Eqqartuussiveqarneq pillugu Siunnersuisoqatigiit innersuussuteqarnerannit tunngaveqarpoq.

Suliassat nassuernertut suliarineqartut suliarineqarnissaannut malittarisassanik eqquussoqarnissaa inatsisissatut siunnersuutip aappaattut siunertaraa, taamaalilluni piaartumik eqqartuussutininik taaneqartartunik eqqartuussisoqarsinnaalerniassammat.

Kalaallit Nunaanni eqqartuussisarnermik inatsimmi suliassat nassuernertut suliarineqartut suliarineqartarineri pillugit malittarisassiortoqarnissaa Naalackersuisut taamaalillutik kissaatigalugu saqqummiussimavaat, matumani unnerluutigineqartoq nangaassuteqanngitsumik nassueruteqarsimatillugu, tassani eqqartuussisooqataasut peqataaffigisussaaffigisaraluanni – pinerluttulerinermik suliame piaartumik eqqartuussutit aalajangiivigineqarnissaata suliarineqarnissaanut inatsisitigut tunngavissap ilanngunneqarnissaa ilanngullugu.

Qallunaat eqqartuussisarnermik inatsisaanni kapitali 76-imi malittarisassat assigalugit, suliat nassuernertut suliarineqartut aamma eqqartuussiviit avaqqullugit akiliisitsissusiinerit pillugit

malittarisassanik imalimmik, eqqartuussisarnermik inatsimmi nutaamik immikkoortumik eqqussisoqarnissaa taamaammat inatsisissatut siunnersuummi aallarnerniarneqarpoq. Ilaatigut akiliisitsissummik aalajangiisoqarnissaa ingerlaannarlu akiliisoqarnissaa pillugu periarfissat annertusineqarnissaannut inatsisitigut tunngaviliisoqarnissaa tassunga atatillugu aallartinniarneqarpoq. Tamanna eqqartuussisarnermik inatsisip allangortinneqarnera pillugu inatsimmi nr. 714 8. juni 2018-imeersukkut (pillaanerit pillugit suliani suliat ingerlanneqartarnerisa sivilissusaasa appartinneqarnerat) qallunaat eqqartuussisarnermik inatsisaata allangortinneqarneranik tunngaveqarpoq.

Pinerluttulerinermi suliani najuutinngitsoornermi eqqartuussutit nalunaarutigineqartarnissaannut ammaassinerup annertusarneqarnissaa inatsisissatut siunnersuutip pingajuattut siunertaraa. Malittarisassat amerlineqarneri pingaartumik qallunaat eqqartuussisarnermik inatsisaata allangortinneqarneranik tunngaveqarput, taakku eqqartuussisarnermik inatsisip, pillaatit il.il. naammassineqartarnerannik inatsisip aamma elektroniskiusumik attaveqaatit- sullissinerillu pillugit inatsit inatsisikkut nr. 203 28. februar 2017-imeersukkut (najuutinngitsoornermi eqqartuussutit, nalunaarutiginnittarneq aamma pillaatissiinermi suliani digitalimik attaveqaatinik atuineq il.il.) naammassineqarput.

Akuerisaasumik pisissutissaqarluni nalunaaruteqaqqaarani unnerluutigineqartuq takkutinnitsoorpat, pineqaatissiissutini akiliisitsinissamik kinguneqartussaannigitsuni, arsaarinninnermik kinguneqartussaannigitsuni, angallassisinnaatitaajunnaarsitaanermik aalajangiiffiunngitsuni aamma taartisiassat pillugit suliat pineqartinnagit, unnerluutigineqartup nassuersimaneratut eqqartuussiviit pinerluttulerinermi sulianik suliarinnissinnaaginnaratik kisianni suliaqassasut, aamma uppersaataitersunngikkaluarlugu suliamik aalajangiissasut, allannguutissasut siunnersuutip kinguneraa.

Naak isertitsivimmi inissinneqarnissaq pineqarsinnaagaluartoq (taamaattoq sivilunerpaamik qaammatini 6-nni) unnerluunneqartuq akuersiteqqaanngikkaluarlugu eqqartuussisarnermik inatsimmi § 453, imm. 3 malillugu eqqartuussutsip aalajangiiffineqarnissaa pillugu pingaarnertut isumaqatigiinniarnertit ingerlanneqarnissaasa siunissami periarfissanngornissaat allannguutip aammattaq kinguneraa. Suliani § 453, imm. 3, nr. 4 malillugu suliarineqartuni, inissiisarfimmi inissiisoqassanersoq pineqartillugu, pinngitsuugassaannigitsumik illersuisussaqartitsinissaq tassunga atatillugu eqqunneqassaaq, soorluttaaq § 453, imm. 3 malillugu suliarineqartut aallarteqqinneqarnissaat pillugit malittarisassanik eqqussisoqassasooq.

Qallunaat eqqartuussisarnermik inatsisaanni § 855 aamma § 897 kingusinnerusukkut inatsimmi nr. 1169-imi 8. Juni 2021-meersumi allangortinneqarmata, torersumik pissuseqarnissaq pillugu maluginiaqquneqarpoq. Kisianni, inatsisip pineqartup allangortinneqarnerata Folketingimi akuersissutigineqarneqannginnerani inatsisissatut siunnersuummi matumani suliarineqarnermi, tamanna sillimaffigineqarsimanngilaq.

Kalaallit Nunaanni Eqqartuussiveqarfimmi eqqartuussisut inatsisilerituullu tjenestemanditut atorfinitsinneqartut tunuartussaataitanerannut ukiorititat 65-inik ukioqalersimanermiit 70-inik ukioqalersimanermut qaffanneqarnissaat kiisalu najukkami eqqartuussisunut tunuartussaataitanermik pisussaaffiup assinganik eqqussisoqarnissaa pillugit Kalaallit Nunaanni tjenestemandit naalagaaffimmit atorfeqartitat pillugit inatsisip allangortinneqarnissaannik inatsisissatut siunnersuut sisamaattut siunertaqarpoq. Ullumikkut najukkami eqqartuussisunut tunuartussaataitanermik pisussaaffeqanngilaq. Eqqartuussisut inatsisilerituullu tjenestemanditut atorfinitsinneqartut allat kiisalu najukkami eqqartuussisut siunissami 70-iliinermik kingorna qaammatip naanerani soraarsinneqartalernissaat

allannguutip kinguneraa. Danmarkimi eqqartuussisunut il.il. tunuartussaaitaanermik malitarisassanut tamanna assinguvoq.

Ingammik tjenestemanditut atorfinitsinneqartunut taakkununga tunuartussaaitaanissamut ukiuliussaqaqarnermut, eqqartuussisut taamaallaat eqqartuussinikkut soraarsinneqarsinnaanerannik pissutaasoq nassaarineqassaaq. Ukioqqortussuseq pissutigalugu eqqartuussisoq sanngiillisimappat, sanngiillisimaneranillu eqqartuussisup aalajangigai sunnertissimappata, atuukkunnaarsinneqarnissamik imaluunniit soraarsinneqarnissamik Den Særlige Klageret-ip aalajangiinissaata tungaanut eqqartuussisoq ingerlaannarsinnaassaaq. Innuttaasunut suliffeqarfinnullu suliani eqqartuussisutigoortuni ilaasunut tamanna annertuumik kinguneqarsinnaavoq.

Kalaallit Nunaanni tjenestemandit il.il. naalagaaffimmi atorfeqartitat soraarnerussutisiassa at pillugit inatsit malillugu, eqqartuussisunut aamma inatsisilerituunut tjenestemanditut atorfinitsinneqartut allanut aamma najukkami eqqartuussisunut qaammatip 60-inik ukioqalerfigisamik naanerani utoqqalinersiaqalersinnaatitaanerata taamaattoq siunnersuummi attorneqassanngilaq. Eqqartuussisut aamma inatsisilerituut tjenestemanditut atorfinitsinneqartut allat aamma najukkami eqqartuussisut 65-ileereernermik kingorna suliat atorfinitsinneqartut, ukiut pensionisiassanut katersuiffiit qaffasinnerpaat 37-iusut angusimanngikkunikkit, akissarsiaqartinneqaannassapput tamatumalu malitsigisaanik ukiut pensionisiassanut katersuiffiit suliat amerlissallugit.

Naalakkersuisut missingiummut oqaaseqaataat

Pinerluttulerinermi suliat naammassiuminarsarneqarneri pinerlunnernit eqqorneqartumut pinerluuteqartumullumi iluaqutaassaaq. Suliat sukkarnerusumik suliarineqarnerani illuatungeriit peqataasut sukkarnerusumik ingerlariaqqissinnaanngussapput aamma pisariaqartinneqartillugu eqqortumik katsorsarneqarsinnaassallutik.

Tamanna tunngavigalugu suliani nassuerfiusuni aamma najuutinngitsoornermi eqqartuussusiisinnaaneq pillugit malittarisassiortoqarnissaa Naalakkersuisut kissaatigisimavaat, taamaalilluni suliat eqqartuussisutigoortut pisariaqanngitsumik sivitsorneqannginniassammata.

Pinerluut nassuerutigineqarsimatillugu aamma nassuerneq suliami paasissutissanit allanit tunngavilersorneqarpat, eqqartuussisooqataasut aggersanngikkaluarlugit, suliat imminut tunngassuteqartup aalajangiiffigineqarsinnaanera ammaanneqarpoq. Tunngaviusumik killisiorneqarnermi eqqartuussisumut sassartinneqarnermut atatillugu piaartumik eqqartuussutip nalunaarutigineqarsinnaalernissaannik tamanna aamma isumaqassaaq, taamaalilluni eqqartuussisooqataasunit suliat aalajangiiffigineqarnissaata tungaanut sivisuumik tigummigallarneqarsinnaanerit pinngitsoortinneqassallutik. Taamatut iliornikkut pinerluuteqartup aalajangiiffigineqarnini ingerlaannaq pissavaa aamma, tigummigallarneqarnissaq tunngavissaqarpat, toqqaannartumik pillaatisiaminik atuisinnaanngussalluni.

Pissutsit immikkut ittut pineqartillugit, unnerluutigineqartoq peqataanngikkaluartoq suliat aalajangiiffigineqarsinnaanera najuutinngitsoornermi eqqartuussutit aqutugalugit periarfissinneqarpoq. Unnerluutigineqartup takkunnissaminik kissaateqannginnera pissutigalugu, suliat sivisunaartumik suliarineqannginnissaanik tamanna kinguneqassaaq, aamma taamaalilluni ilisimannittut eqqartuussivimmilu peqataasut allat, unnerluunneqartup

takkutinngitsoorneratigut eqqartuussinerni taamaatitsiinnarnerni eqqartuussinernut asuliinnaq qaaqquneqassanngillat.

Naggataagut eqqartuussisunut tunuartussaataaneq 65-inik ukioqalersimanerminngaanniit 70-inik ukioqalernermit allanngortinneqarpoq, soorlu aamma najukkami eqqartuussisut aaqqissuussinermut aamma ilanngunneqartut. Eqqartuussisumut 70-iliinissami tungaanut suliaminik ingerlatsiinnarusuttumut, taamaaliorsinnaanerup periarfissaqalernera tamatuma kinguneraa. Pisussaaffiunngimmat kisiannili periarfissaammatt erseqqissaatigineqassaaq. Kisianni 70-ileereernerup kingorna suliiinnarnissaq periarfissaassanngilaq, soorlu ullumikkut najukkami eqqartuussisunut taamaattoq.

Pisortani aningaasarsiornikkut allaffissornikkullu kingunerisassat

Soqanngilaq.

Aningaasaqarnikkut allaffissornikkullu namminersorlutik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut allaffissornikkullu kingunerisassat

Soqanngilaq.

Tusarniaaneq

Justitsministeeriaqarfiup tusarniaaneq ingerlassimavaa, tassani kalaallit nunaanni oqartussaasut naleqquttut ilanngunneqarsimapput. Siunnersuut piffissami 2021-imi 19. januarimiit 16. februarimut tusarniutigineqarsimavoq.

Ilanngussat

1. Kalaallit Nunaanni eqqartuussisarnermik inatsisip aamma Kalaallit Nunaannit tjenestemandit pillugit inatsisip allanngortinneqarnissaannik inatsimmut missingiutip eqqikkaavigineqarnera
2. Kalaallit Nunaanni eqqartuussisarnermik inatsisip aamma Kalaallit Nunaannit tjenestemandit pillugit inatsisip allanngortinneqarnissaannik inatsimmut missingiut
3. Oqaaseqaateqarnerit oqaaseqarfigineqartut allattorsimaffiat